

Internè rarò utitur , quia efficacitèr sursum , & deorsum purgat.

Dosis à grano uno ad grana tria.

Nota : si præcipitatio fiat cum URINA HUMANA , loco AQUÆ COMMUNIS , Mercurius vitæ rubicundi coloris erit, quem aliqui MINERALEM ROSAM nominant : si Mercurius vitæ , seu Antimonii Magisterium cum triplo nitri in crucibulo calcinetur , & dulcoretur BEZOARDICUM MINERALE verè vocatur , & eisdem usibus inservit.

Si liquor Acidulus à præcipitatione Mercurii vitæ residuus , rectificetur ex cucurbita igne arenæ , nihil aliud est , quàm Spiritus Salis , prius in Butyro Antimonii concretus , ad Mercurii sublimationem impensus , & iterum suo juri redditus , & resolutus , liberatusque à dicto Magisterio. SPIRITUS , ab aliis , VITRIOLI PHILOSOPHICUS perperam vocatur.

Hujus Spiritus usus , idem est ac Spiritus Salis communis.

CAPUT III.

DE PRÆPARATIONIBUS MERCURII.

MERCURIUS PRÆCIPITATUS ALBUS.

R Mercurii vivi optimè depurati , . . uncias quatuor.
 Spiritus Nitri , seu Aquæ fortis , . . uncias sex.
 Vel quod sufficiat : stent per noctem in Matraccio vitreo , vel donec Mercurius solutus fuerit , deinde fume.
 Aquæ communis , uncias sexdecim.
 Salis communis , uncias duas.
 Fiat solutio , & filtratio , affundatur dissolutioni Mercurii , & fiet præcipitatio , cui adde uncias sexdecim Aquæ

fontanæ ; sicque ad fundum præcipitabitur pulvis albus : postea liquorem decanta , & Aquæ puræ lotionibus pulverem edulcora , ac in umbra exsicca , & usui serva.

Externè utitur mistus in unguentis contra lichenès , scabièm , pruritum , & similes affectus.

Dosis à semidrachma , ad drachmam unam , pro quacumque unguenti uncia.

Internè quoque à quibusdam adhibetur ad salivationem excitandam.

Dosis à granis quatuor ad quindecim.

Vomitum etiam movet , ac secessum ; sed magna cum cautela administrari debet.

Nota : ex hoc præcipitato Mercurius sublimatus dulcis fieri poterit : si in phiala vitrea positus , igne arenæ sublimetur.

MERCURIUS PRÆCIPITATUS RUBER.

R. Mercurii vivi , quantum placet. Dissolvatur ex arte in Aquæ fortis sufficienti quantitate. Solutio evaporetur in phiala igne mediocri ad siccitatem : erit massa alba , quæ igne ad tertium gradum aucto colorem sensim mutabit , ut postremo evadat ruberrima.

Intrinsècus eo nonnunquam utitur ad salivationem promovendam.

Dosis à grano uno ad grana quatuor.

Extrinsècus , Chirurgi eo utuntur , ut rodente & escharotico , in ulceribus inveteratis fistulosis venereis , & similibus.

ARCANUM CORALINUM.

R. Mercurii præcipitati rubri , . . quantum volueris. Immitte in Matracium vitreum , & igne arenæ calcinetur , usquequò Matracium candescat ; remove ab

Nnn

igne, & super materiam pulveratam affunde Spiritum Vini rectificatum ad eminentiam transversi digiti: accende, & sæpius repete Spiritum Vini, usque ad siccitatem semper deflagrando, & usui serva.

In morbo gallico, in obstructionibus contumacibus, podagra, & hydrope inservit.

Dosis à granis duobus ad grana sex.

Externè pro medicamento exsiccativo in ulceribus venereis, & similibus applicatur.

TURPETHUM MINERALE, SEU PRÆCIPITATUS
FLAVUS.

R. Mercurii vivi, uncias duas.
Olei Vitrioli rectificati, uncias sex.

Mercurium mitte in retortam, & affunde oleum vitrioli, dein vas impone igne arenæ, dum bulliat liquor, & Mercurius solvatur: peracta solutione, aucto igne, ad siccitatem evaporetur: materiam exemptam tere in mortario vitreo, tritamque conjice in aquam calentem, & præcipitabitur pulvis flavus, qui repetitis aquæ lotionibus dulcoretur, siccetur, & usui fervetur.

Salivationem, & alvum movet, ac sæpe vomitum.

Dosis à grano uno ad grana quinque.

Nota: Medicamentum prædictum videtur esse illud tantoperè à Paracelsò laudatum, & pro maximo arcano in morbis venereis ab eo habitum.

Si autem Spiritus Vini tartarifatus prædictæ operationi addatur, & per aliquod dies digeratur, ac deinde accendatur ad siccitatem, benignius operatur; semper autem cum cautela uti debet.



MERCURIUS PRÆCIPITATUS VIRIDIS.

R. Mercurii vivi, uncias duas.
 Limaturæ Cupri, unciam semis.
 Scorsim dissolve in

Aquæ fortis, quantitate sufficienti.

Solutiones misceantur, & per retortam igne arenæ Aqua fortis evocetur usquequò fumus à Mercurio exiens crassus appareat : igne aucto materiam calcina, exemptam, & pulveratam in Aceto distillato per biduum digere : ultimò ebulliat acetum per horam circiter, dein filtretur ; materiæ superstiti novum acetum distillatum adde : digere, & filtra ut suprà ; liquores tandem misceantur, ac ad Mellis consistentiam vaporentur, materia ad frigus indurata in vase vitreo servetur.

Vermes necat, gonorrhœæ virulentæ opem præstat.

Dosis à granis duobus ad grana sex.

MERCURIUS PRÆCIPITATUS PER SE.

R. Mercurii vivi puri, quantum volueris.
 Inde pluribus ampullis fundo planis, taliter ut uniuscujusque ampullæ fundus tantummodò obtegatur, ex arena digere igne leni, & gradatim aucto per mensem & ultra, usquequò ebullire videatur : sicque pulverem subrubrum obtinebis : in Mercurio superstiti superiorem processum repete, donec omnis Mercurius in rubicundum pulverem abierit.

Ad exterminandam luem veneream, cunctosque ab ea ortos affectus, à quamplurimis summopere extollitur, suas autem exerit vires per vomitum, secessum, salivationem, ac diaphoresim, ut & alia prædicta medicamenta mercurialia.

Dosis à granis duobus ad grana quinque.

Nnn ij

R. Mercurii puri, libram unam.
Mitte in Matrarium, & affunde,
Spiritus Nitri, seu Aquæ fortis, . . uncias decem & sex.
Impone arenæ calidæ ad absolutam dissolutionem; dein
in cucurbita vitrea igne arenæ leni, ad siccitatem evapora:
massam superstitem in mortario marmoreo pulvera, &
misce cum.

Vitrioli ad albedinem calcinati, . . }
Salis marini decrepitati, } ana libra una.

Misturam inde in Matrarium triplo capacius, ita tamen
ut dimidia Matrarii pars in arena demergatur, deindè ignem
admove per gradus ad summum urgendum; duodecim
fermè horarum spatio. Mercurius vasis lateribus ad-
hærens sublimabitur: refrigerato vase exime, & usui serva.

Externè utitur in aqua solutus, seu mistus cum un-
guentis, ad carnem supercrescentem exedendam, & sca-
biem, impetigines, similesque affectus cutaneos sanan-
dos.

Internè verò numquam utitur, quia præsentaneum
venenum est.

SUBLIMATUS CORROSIVUS ALIO MODO FIERI.

POTEST.

R. Mercurii crudi, }
Vitrioli ad flavedinem calcinati } ana libram unam
Nitri purificati, }
Salis communis, } ana semilibram.

Seorsim pulverentur, misceantur, & dividantur in duo-
decim partes æquales, dein fume

Mercurii Crudi unciam unam.

Salium mistorum, uncias duas.

Triturentur in mortario ligneo cum pistillo, donec

in pulverem reducantur , nec amplius Mercurii globuli sub conspectum cadant : mistura servetur , & prædicta operatio repetatur usque ad salium , & Mercurii consumptionem in eadem quantitate. Misturæ omnes indantur in Matracium ejus capacitatis , ut non ultra tertiam sphericam cavitatem implere possint. Collocetur vitrum ultra medietatem in arena , & fornaci convenienti ; ubi supposito , & per gradus , ad summum aucto igne , duodecim vel sexdecim horarum spatio peracto , Mercurius superiori vasis parti sublimatus adhærebit. Vase refrigerato sublimatum exime , & usui ferva.

Eisdem usus habet , quàm præcedens.

MERCURIUS SUBLIMATUS DULCIS.

R. Mercurii sublimati Corrosivi, uncias octo.
Mercurii crudi puri, uncias sex.

Sublimatum tere in Mortario marmoreo miscendo paulatim Mercurium crudum , donec penitus reddatur inconspicuus : divide in ampullas igni arenæ superpositas : ignem per gradus augendo , sublimationem institue : Mercurium per aliquot horas , vasorum lateribus hærentem , exime , ac eundem à sordibus separatum , tere ; sublima iterum ex aliis ampullis : sublimationes sexies saltem repete , usquedum ad gustum nullum corrosionis indicium deprehendatur , vel si cum pauxillo Salis Tartari sit admistum , & in aqua solutum , color niger evadat ; si tamen pallidus , aut rubicundus appareat , indicium verum est , non esse satis sublimatum , nec dulcificatum , donec candidissimus , & omnis saporis expers evadat.

In gonorrhœa virulenta , aliisque affectibus à lue venerea pendentibus internè adhibetur , itemque ad vermes necandos.

Dosis à granis quinque ad scrupulum unum , vel semidrachmam.

Nota: Mercurius dulcis ab aliquibus dispensatur sub nomine *CALOMELANOS RIVERII*.

PANACEA MERCURIALIS.

R. Mercurii dulcis, uncias sex.
Lævigetur in mortario marmoreo, & mittatur in ampullam vitream capacem, arenæ impositam, igne leni primò (postea per gradus augendo) sublimetur, & peracta sublimatione, ampullam refrigeratam frange, sublimatum facilè exemptum, iterum læviga, & sublima ex alia ampulla, idque septies repete, semper sæcibus abjectis: sublimato, lævigato, & cucurbitæ vitreæ indito, spiritum vini rectificatum affunde, & aliquibus resinosis aromatum partibus imprægnatum, ad quatuor digitorum eminentiam: digere per dies quindecim, massam sæpiùs agitando: tunc vasis refrigeratis, spiritum vini per inclinationem effunde, Panaceam exime, exsicca, & serva.

Ad salivationem excitandam in morbis venereis præcribitur.

Dosis à granis decem ad semidrachmam.

MERCURIUS VIOLACEUS.

R. Florum Sulphuris, uncias quatuor.
Mitte in vas terreum, liquefiant, & vase ab igne remoto, sensim adde

Mercurii vivi puri, uncias sex.

Salis Ammoniaci pulverati, uncias quatuor.

Omnia spathula ferrea move, & misce: fluentem adhuc materiam extrahe, & statim ac materia frigefiat, pulveretur, & capaci Matraccio indatur; postea sublimetur igne sensim aucto ad tertium gradum. Disruptis vasis, albos flores exime, & abjice. Subtractam materiam omnem tere, ac in Matraccio iterum sublima; idem adhuc bis repete, ac habebis massam supernè luteam, & levem; in-

ferne verò ponderosam , nigricantem , quandoque violaceam : hanc portionem super porphyritem læviga , & Mercurium Violaceum obtinebis , quem spiritu vini super accenso edulcorabis.

Medicamentum hoc pro diaphoretico habetur , & nihil aliud est quam Æthiops mineralis. Obstructionibus, Rheumatismis , affectibus venereis ; Epilepsiæ , Scrophulis , Asthmati , ac similibus prodest ; vermes etiam necat.

Dosis à semisrupulo ad scrupulum unum.

ÆTHIOPS MINERALIS.

R. Mercurii vivi puri , uncias duas.
Florum Sulphuris , uncias quatuor.

Misce , & tere in mortario vitreo , donec Mercurius reddatur inconspicuus , ac pulvis intensè nigrescat : repounatur , & servetur.

Ad enecandos , & expellendos lumbricos pro specifico habetur.

Dosis à semisrupulo ad drachmam unam.

Cum Balamo de Copaiva , vel Rob Juniperino in Pilulas redactus propinatur : ad scabiem , luem veneream , gonorrhœam , & similes affectus inservit.

Nota : Mercurii , & Sulphuris mistura in patella terrea levi igne calcinetur ad sulphuris deflagrationem , restabit pulvis niger , seu fuscus , qui ÆTHIOPS MINERALIS CUM COMBUSTIONE VOCATUR.

Dosis à granis sex ad semi drachmam.

CINNABARIS ANTIMONII.

R. Massam superstitem ex Antimonii Butyro , cum una Antimonii crudi parte , & duabus sublimati corrosivi confecto.

In retortam immitte , sive in ampullam , & igne are-

næ per gradus aucto ad summum sublimabitur : Cinna-
baris in collo retortæ, seu ampullæ adhærens, separetur,
& aqua dulcoretur, tum nova sublimatione rectificetur,
ac usui fervetur.

Vires ejus prædicantur specificæ ad epilepsiam, verti-
ginem, & ad humores coagulatos resolvendos.

Dosis à granis sex ad scrupulum unum.

CINNABARIS COMMUNIS OFFICINALIS.

R. Sulphuris communis citrini, . . . libram unam.
In olla terrea liquefiat, eique admisceantur fen-
sim, continuò agitando

Mercurii vivi, libræ tres.

Donec Mercurius extinctus conspiciatur, quibus perac-
tis, massam in cucurbitam terream humilem immitte, &
patella terrea foraminulata tegatur, igne aperto sublime-
tur in massam rubram, quæ à vasis separata fervetur.

Ad eisdem usus, ac Æthiops mineralis inservire di-
citur, quia nihil aliud est, quàm Æthiops mineralis per su-
blimationem factus.

SACCHARUM MERCURII, SEU VERMIFUGUM.

R. Mercurii purissimi, uncias duas.
Sacchari albißimi, uncias quatuor.

Tere simul in mortario marmoreo, donec Mercurius,
penitus sit extinctus, qui ad usum fervetur.

In infantibus pro vermibus necandis, eo utuntur Me-
dici.

Dosis à granis sex ad scrupulum unum.



AMALGAMA MERCURII CUM PLUMBO.

R. Mercurii vivi, uncias quatuor.
Calefiat in crucibulo modico igne : calefacto affunde

Plumbi in alio crucibulo liquefacti, . . unciam unam.
Agitentur spathula lignea ad perfectam mixtionem.
Miscetur unguentis , aut linimentis mercurialibus.

AMALGAMA JOVIS.

R. Stanni purissimi Anglici, uncias duas.
Liquefiat in crucibulo.

Mercurii vivi, uncias tres.

Immitte in alio crucibulo , quod in igne maneat , donec fumos emittat Mercurius, qui mox affundatur Stanno liquefacto. Agitentur assidue spathula lignea in mortario marmoreo, addendo pauxillum salis communis ad perfectam purificationem. Pastam multoties aqua ablue , donec insipida evadat.

Pro paranda aqua diuretica , & antihysterica, in officinis in usu est.

CAPUT IV.

DE CROCIS.

CROCUS MARTIS (VULGO) APERIENS.

R. Limaturæ ferri, quantum volueris.
Aqua pluviali , vel rore majali identidem irroretur , donec in rubiginem redigatur , dein supra porphyritem lavigetur , & usui tandem servetur.

In absorbendis acidis in primis viis , singulare remedium esse dicitur : propterea in obstructionibus corporis totius, & in affectibus ab eis productis , mirè prodest.

Dosis à granis quinque ad scrupulum unum.

Ooo